

ius persequi superfluum est, sensum & cogitationem in brutis demonstrant, nec mechanice fieri possunt. Hæc altera propositio; *Animæ brutorum cum corpore pereunt*, ab omnibus, si paucos metempsychosis aut harmoniæ præstabilitæ patronos excepias, admittitur. Et quidem si anima bruti est spiritualis & immortalis, quid agitur de innumeris illis tot animaculorum animabus immortalibus? An de corpore in corpora transmigrant? An entia in Mundo inutilia fiunt post corporis interitum? Præterea quemadmodum crudelis merito dicitur homo, qui hominem occidit, cujus anima est immortalis, ita non sine crudelitate summa perirent tot animalia, quorum anima immortales essent.

Respondent Cartesiani negando bruta animantia cogitare aut proprie sentire, aut ullam illis esse animam a corpore distinctam, multisque rationibus probare nituntur Deum potuisse facere corpus bruti quale est, ita ut sine ulla anima & per solum corporis *mechanismum* omnes quas in brutis miramur actiones obiret. Totam, quantum possunt, suæ hypothesei probabilitatem conciliant Cartesiani his aliisque similibus exemplis & rationibus. Ea est hominum industria ut machinas brütis animantibus fere similes fingere potuerint. Fertur Johannes Regiomontanus aquillam lineam fecisse, quæ in aera sese recipiens Imperatori Norimbergam tendenti viam demonstravit; muscam quoque volatilem finxisse dicitur. Notissima sunt omnibus, quæ narrantur de scili capite Alberti Magni, quod